



Dr. Hans Peter Märchy, manader
Gäuggelistrasse 7, Chascha postala 46, 7002 Cuirra

Tel. 081 254 12 30 / Fax 081 254 12 42
E-mail hans.peter.maerchy@ahb.gr.ch
Internet www.ahb.gr.ch

Als presidis da las autoritads da
scola ed a las direcziuns da las scolas
popularas

Cuirra, ils 22-06-2011

Novaziuns en il rom da la procedura d'admissiun a l'emprima classa dal gimnasi da sis onns

Stimadas dunnas e stimads signurs

Sa referind a mia brev dals 15 da favrer 2011 obtegnais Vus ulteriuras infurmaziuns davart sis novaziuns fundamentalas en connex cun la procedura d'admissiun per la midada en l'emprima classa dal gimnasi da sis onns [Examen d'admissiun a l'emprima classa dal gimnasi (EA 1G)]. Questas novaziuns valan gia per ils examens d'admissiun 2012.

1. Termin d'examen da nov il favrer

In'emprima midada essenziala pertutga l'anticipaziun dal termin da EA 1G. Da vart da las direcziuns da scola da las scolas popularas e da las scolas medias han ins gia daditg exprimì il giavisch d'anticipar il termin dal EA 1G per motivs organisatorics (planisaziun dals pensums, furmaziun da classas, engaschament da magistras e magisters, zavrar la procedura d'admissiun al progimnasi e l'attribuziun al stgalim superiur da la scola populara). Causa ils temps da vacanzas regionalmain differents en noss chantun, surtut da las vacanzas da primavaira, èn sa resultadas be paucas pussaivladads per fixar in termin d'examen anticipà. Considerond detagliadamain tut ils avantatgs e dischavantatgs sa basond sin l'art. 5 da l'ordinaziun davart la procedura d'admissiun a las scolas medias (ordinaziun d'admissiun a las scolas

medias), han ins decidì da manar tras il **EA 1 G per il proxim onn da scola ils 14 da favrer 2012.**

L'examen unifitgà per l'admissiun a la 3. classa dal gimnasi resp. a la 1. classa da la scola media commerziala u da la scola media propedeutica (examen unifitgà) ha lieu ils 20 da mars 2012. Per motivs logistics han ins stuì sbittar da far il EA 1G e l'examen unifitgà il medem mument.

2. Enconuschientschas preliminaras definidas da nov

Perquai ch'ins ha anticipà il termin dal EA 1G, han ins stuì adattar la materia d'examen e las enconuschientschas preliminaras ch'èn relevantas per il EA 1G. Las cundiziuns da basa per mintga rom d'examen èn vegnidas adattadas d'ina grupp da lavur, da la quala han fatg part magistras e magisters primars, personas d'instrucziun spezialisadas sco er las inspecturas ed ils inspecturs da scola responsabels. A basa dal plan da materias reduci han ins cumplettà l'examen per exempel en il rom matematica cun il champ "quintar fixond a chau". Ils pensums vegnan dads en scrit, ston dentant vegnir schliads senza nudar las vias che mainan a las soluziuns u resultats intermediars. Las disposiziuns davart las enconuschientschas per il EA 1G vegnan publitgadas per tut ils roms sin la pagina d'internet www.mittelschulen.gr.ch. Là stattan a disposiziun er examens dals onns passads ed exempels da quintar fixond a chau per telechargiar. Igl è dentant da resguardar ch'ils anteriurs examens n'èn - causa las midadas menziunadas - betg da cumparegliar directamain cun las dumondas d'examen spetgadas per il EA 1G 2012. Observond però las adattaziuns da la materia d'examen pon ellas vegnir duvradas sco agid da preparaziun.

3. Resguardar duas linguas chantunalas

Tenor la legislaziun vertenta vegnan examinads tut ils uffants al EA 1G en matematica ed en l'emprima lingua inditgada da l'educatura u da l'educatur. Tenor il conclus da la regenza vegnan resguardadas a partir dal proxim onn da scola ultra da la matematica **duas linguas chantunalas** tar tut las candidatas e tut ils candidats en la procedura d'admissiun a l'emprima classa dal gimnasi. L'emprima lingua tschernida vegn sco fin ussa examinada en scrit al EA 1G. Per la segunda lingua chantunala decida la nota da l'emprim semester da la scola cedenta, per regla da la sisavla classa primara. Da questas duas notas resulta la nota dal rom d'examen per linguas (nota dal rom d'examen per las linguas chantunalas) ch'è relevanta per la

decisiun d'examen. La procedura vegn explitgada a maun d'in exempel sin la pagina d'internet www.mittelschulen.gr.ch.

La nota d'admissiun vegn calculada sco fin ussa. Tant per la calculaziun da la nota dal rom d'examen per las linguas chantunalas sco er per la nota d'admissiun dovra il secretariat per ils examens tenor l'art. 16 da l'ordinaziun d'admissiun a las scolas medias las notas da l'emprim semester da tut ils roms relevants, e quai da tut las candidatas e da tut ils candidats annunziads al EA 1G. Las notas da semester da quests roms ston - sco gia l'onn current - esser registradas en l'attestat da l'emprim semester da l'onn da scola actual. Las educaturas ed ils educaturs da las candidatas e dals candidats annunziads al EA 1G èn obligads da trametter l'attestat da l'emprim semester da l'onn da scola 2011/12, suttascrit dad els e da la magistra u dal magister da classa responsabel, fin il pli tard **ils 31 da schaner 2012** a l'uffizi per la furnaziun media-superiura (UFMS). Tut las magistras e tut ils magisters da las scolas popularas survegnan sco mintg'onn en il decurs dal december las datas d'access ch'èn necessarias per far l'attestat da semester.

4. Premissas da reussida adattadas per il EA 1G

Cun la nova procedura da calculaziun da la nota dal rom d'examen per linguas han las notas da l'emprim semester da la scola cedenta survegnì dapli impurtanza en cumparegliaziun cun las notas dals roms examinads en scrit a l'examen d'admissiun. Quai giustifitgescha in'adattaziun da las premissas da reussida per l'admissiun a l'emprima classa dal gimnasi a las disposiziuns che valan per l'admissiun a la 3. classa dal gimnasi. La media da reussida da las notas dals roms d'examen (nota da matematica, nota da las linguas chantunalas [nota dal rom d'examen per linguas, cf. cifra 3], nota d'admissiun) sto esser ussa da nov 4.50. Ultra da quai dastga la summa da las differenzas da las notas dals roms d'examen sut 4 esser maximalmain 0.75 puncts (tar l'examen unifitgà 1.5 puncts), perquai ch'i vegnan examinads be dus roms - tar l'examen unifitgà vegnan examinads quatter roms.

5. Midada dal progimnasi al stgalim superiur da la scola populara

Vinavant vala la regulaziun, che la procedura d'admissiun è concludida cun success mo, sch'ins vegn promovì a la fin da l'emprima classa dal gimnasi (art. 24 al.1 da l'ordinaziun d'admissiun a las scolas medias). Las directivas pertutgant la midada dal progimnasi al stgalim superiur da la scola populara percunter è vegni repassà dal

departament d'educaziun, cultura e protecziun da l'ambient cun la disposiziun dals 7 d'avrigl 2010. Vinavant na datti betg la pussaivladad da repeter l'emprima classa dal progimnasi. Cuntrari a l'anteriura regulaziun na vegnan las scolaras ed ils scolars che na vegnan betg promovids al progimnasi a la fin da l'emprim onn da scola betg automaticamain renviads a l'emprima classa da la scola secundara. Sco consequenza da la nunpromoziun datti il proxim onn da scola u in'admissiun a la segunda classa secundara u, sch'ins ha notas da promoziun insuffizientas en pli che trais roms centrals (linguas chantunalas, matematica, englais ed instrucziun da la natira) ina nov'entschatta en l'emprima classa secundara. La regulaziun detagliada pon ins leger en las novas directivas concernent la midada dal progimnasi al stgalim superiur da la scola populara (DD nr. 142/7.4.20011). Las directivas èn publicadas sin la pagina d'internet www.mittelschulen.gr.ch.

6. Scadenza dals termins d'annunzia

Cun excepziun da l'examen d'admissiun a las classas superiuras pon ins – sco gia quest onn – s'annunziar a l'examen d'admissiun be per internet. Per il EA 1G 2012 pon ins s'annunziar electronicamain dals 3 d'october 2011 fin ils 16 da december 2011 (termin d'annunzia EA 1G 2012), per l'examen unifitgà 2012 dal 1. da november 2011 fin ils 16 da schaner 2012 (termin d'annunzia examen unifitgà 2012). Da nov sto vegnir observada **la scadenza** dals termins d'annunzia, perquai che annunzias retardadas na pon betg vegnir resguardadas. Las indicaziuns exactas pertutgant la procedura d'annunzia electronica vegnan messas a disposiziun la stad 2011 sin la pagina d'internet www.mittelschulen.gr.ch.

7. Resumaziun

Resumond datti suandantas novaziuns per l'examen d'admissiun a l'emprima classa dal gimnasi da sis onns:


- **Anticipaziun** da l'examen d'admissiun EA 1G (ils 14 da favrer 2012)
- **Enconuschientschas preliminaras** definidas da nov
- Resguard da **duas linguas chantunalas**
- Novas **premissas da reussida**
- **Directivas adattadas** concernent la midada dal progimnasi al stgalim superiur da la scola populara

- Annunziadas retardadas **na vegnan betg resguardadas** (vala era per l'examen unifictà)

Ulteriuras infurmaziuns davart l'examen d'admissiun 2012, sco er exempels d'examen da l'onn 2011 vegnan mess a disposiziun avant il cumenzament da l'onn da scola 2011/12 sin la pagina d'internet www.mittelschulen.gr.ch.

Jau As supplitgesch da render questas infurmaziuns accessiblas en moda adattada a magistras e magisters sco er ad educaturas ed educaturs da Vossas scolaras e da Voss scolaras e d'als sustegnair da surpigliar lur responsabladad. Per eventualas dumondas As stat a disposiziun dunna Regina Just Brodbeck per telefon 081 254 12 34 u per e-mail (regina.just@ahb.gr.ch). Jau As engraziel cordialmain per Vossa collavuraziun.

Amiaivels salids
**Uffizi per la furmaziun media-
superiura**



dr. Hans Peter Märchy, manader

Copias a

- Uffizi per la scola populara ed il sport (USS)
- Gruppa directiva per ils examens d'admissiun a las scolas medias dal chantun Grischun (GDEA)
- Conferenza da las directuras e dals directurs da las scolas medias grischunas (CDSMGR)
- Cumissiun da surveglianza da las scolas medias dal chantun Grischun (CSSMGR)